

Kalaallit ilinniagaqartut, ilinniarnissartik siunertaralugu nunanut allanut nuukkallarsimasut Inatsisartunut qinersinerni qinerseqataasalernissaasa sulissutigingasuarmissaat pillugu Naalakkersuisut peqquneqarnissaannik Inatsisartut aalajangiiffigissaattut siunnersuut.

(Inatsisartunut ilaasortaq Andreas Rene Uldum, Demokraatit)

Siullermeerneqarnera

Akissuteqaat

(Nunamut Namminermt, Pinngortitamut Avatangiisinullu Naalakkersuisoq)

Aallaqqaasiullugu Naalakkersuisut aalajangiinissamut siunnersuummut qujassuteqarput. Soorlu siunnersuuteqartup allakkaa, inuusuttortavut arlallit Nunatta avataanut ilinniagaqarniarlutik nuukkallartarput. Ilinniagaqartut Inatsisartunut qinersinnaatitaanertik malittarisassat atuuttut naapertorlugit attatiinnartarpaat. Tamanna tamat oqartussaaqataaneranni periuseq pitsaasuvoq! Naalakkersuisut siunnersuummi siunertarinqartunut isumaqataapput.

Siunnersuuteqartup oqaatigivaa periarfissaasoq ilinniartut aallarlutik nuunnerannut atatillugu quppersakkamik nassiussinikkut ilinniartut qinersisussat allassimaffianniiginnartinniarlugit eqqaasitsarnissaq, tamatumalu kingorna ukiut marlukkaarlugit eqqaasitsissuteqartarnissaq.

Naalakkersuisunit ullumikkut qulakkeerneqareernikuuvoq Inatsisartunut qinersisoqartussaattillugu paasisutissanik attuumassuteqartunik ilaatigut Nunatta avataani ilinniagaqartut allakkatigut taasisinnaanerannik periarfissaqarnermik ilisimatitsissutinik nassitsisarneq. Tamanna pisarpoq Qinersinermut Ataatsimiititaliap Allattoqarfia Nunatta Københavnimi Sinniisoqarfianut, Aningaasaqarnermut- aamma Nunamut Namminermt Pissutsinut Ministeriaqarfimmum (Økonomi- og Indenrigsministeriet), Nunanut Allanut Ministeriaqarfimmum (Udenrigsministeriet), Savalimmiuni Naalagaaffiup Sinniisaanut (Rigsombudsmanden på Færøerne) qinersinissaq pillugu nalunaaruteqarneratigut, taamattaq nalunaarut Statstidende-mi ilanngunneqartarluni

Ulloq qinersiviusussaq aamma allakkatigut taasisinnaanermik periarfissaqarneq pillugu nalunaarut Københavnimi Sinniisoqarfiup ukununga nalunaarutigisarpa: Qallunaat Nunaanni napparsimmavinnut, Kalaallit Illuinut, kalaallit angerlarsimaffiinnut, ataatsimoortumik angerlarsimaffeqarfinnut aammalu Danmarkimi ilinniagaqartut kattuffiannut Avalak-mut. Nunani allani ilinniagaqartut eqqarsaatigalugit danskit aallartitaqarfii aamma generalkonsuleqarfii suleqatigalugit paasisitsiniaaneq ingerlanneqartarpoq.

Siunnersuuteqartup periarfissatut allatut oqaatigivaa Kalaallit Nunaata avataani ilinniarniartut ilinniagaqarnersiutisiaqarusullutik qinnuteqarnerannut atatillugu krydsiliilluni qinersisussat allassimaffianniiginnarusunnermik nalunaaruteqartoqarsinnaaneq. Tamanna periarfissaq nalilerneqarpoq misissorneqartariaqartoq, ilaatigut inatsisit atuuttut naapertorlugit ilinniagaqarnersiutisiaqartitsinermt qarasaasiatigut ingerlatseriaaseq aamma qinersisussat allassimaffii ataatsimut ingerlanneqarsinnaanersut eqqarsaatigalugit.

Periarfissatut allatut oqaatigineqarpoq sap.ak. arfinilinnik killissarititap allanngortinneqarsinnaanera, taamaalilluni qinersinissap suaarutigineqareerneratigut ilinniartut qinersisussat allassimaffiannut ilanngunneqarsinnaanerat periarfissaqarnerulersillugu. Qinersinermi inatsimmi killissarititaq taanna aalajangersarneqareernikummat (§ 20, imm.5), inatsimmi allanngortitsisoqartariaqarpoq.

Periarfissatut allatut aamma oqaatigineqarpoq eqqarsaatigineqarsinnaasoq malittarisassat allanngortinnerisigut qulakkeerneqarsinnaasoq ilinniartut Kalaallit Nunaata avataanut nuukkallarsimasut qinersisussat allassimaffianniiginnartinneqarsinnaasut, nammineerluni peerneqarnissamik kissaateqartoqarsimatinnagu. Tamanna periarfissaq aamma sukumiinerusumik nalilersorneqartariaqarpoq, ilaatigut ilinniakkamik ingerlatsinerup piffissakkaartumik uppersarneqartarnissaa eqqarsaatigalugu.

Ataatsimut nalilerneqarpoq siunnersuutit ataasiakkaat eqqarsaatigalugit suliap ingerlateqqinneqarnissaanut kiisalu kingusinnerusukkut Inatsisartunut qinersisarnerit pillugit inatsisip allanngortinneqarsinnaaneranut atatillugu nalilersorneqarsinnaasut.

Naalakkersuisut tamanna tunngavigalugu innersuussutigaat siunnersuut akuersarneqassasoq.